

Despedida pa Pader Fransen



Ariba e foto Pader Fransen cu e bunita cuadro memey di tur e trahadornan pastoral hubenil di Duc in Altum

DESPUES di a permanece pa mas cu cuarenta (40) aña na Aruba, Pader Wijbe Fransen ta repatria pa Hulanda na juni proximo. Siendo un religioso di e Orden di San Dominico, Pader Fransen a traha pa mas cu trinta (30) aña den parokia como sacerdote y como dies (10) aña na Centro Pastoral ARUBA.

Pader Fransen durante e periodo di 2005 pa 2008 tabata e director spiritual di e curso di Duc in Altum, un estudio na unda a participa como 40 persona tanto laiconan como maestronan di scol. Tur e personanan aki a ricibi nan diploma como trahador pastoral hubenil y ta prepara pa traha cu hobennan sea den parokia of na scol riba e tereno di formacion spiritual. Tambe nan por asisti den e diferente

trabaonan di evangelisacion cu ta bao guia di Centro Pastoral Aruba.

Recientemente e grupo di Duc in Altum a tuma despedida di Pader Fransen durante un celebracion eucaristico na Iglesia Fatima na Dakota sigui pa un desayuno cu un programa special dedica na Pader Fransen y Pader Jacques van der Lee, kende tambe lo regresa Hulanda.

Tabatin declamacion di un poesia di Digna Lacle-Herrera, canto, drama y presentacion di varios regalo. Un regalo special ta un cuadro pinta pa e artista Elvis Tromp, kende a haci un bunita obra pa un recuerdo pa Aruba di e trabao di e ultimo 3 padernan Hulandes, esta pader Bouman, kende ya a regresa Hulanda,

pader Fransen y Pader van der Lee.

Cu baymento di e padernan menciona ta finalisa un mision di 140 aña di padernan Hulandes di Orden di San Dominico. Pader Fransen y Pader van der Lee, conoci como padernan Dominicano a traha den Iglesia, hospital, organisacionnan social manera SAMBA, Osticeba y Fundacion Reclassering y ultimamente na Centro Pastoral.

E grupo di Duc in Altum lo bay pone nan conocimiento den practica dor di bay traha cu hobennan den tur parokia na Aruba p'asina yuda nan den nan formacion spiritual cu ta hopi importante pa nan por biba leu for di tur adiccion cu ta menasa e hubentud awendia.